



28. Aprili 2026

UPA2026/37

Timersorneq timigissarnerlu pillugit Inatsisartut inatsisaata allanngortinneqarnera pillugu Inatsisartut inatsisissaattut siunnersuut

(Ilinniartitaanermut, Kultureqarnermut Timersornermut Ilageeqarnermullu Naalakkersuisoq)

Siumut isumaqarpoq timersorneq inuiaqatigiinni pingaaruteqarlunnartoq. Timersorneq innuttaasunik peqqissuunermik, atugarissaarnernik aammalu ataatsimoornermik pilersitsisarpoq. Taamaattumik inatsisip nutarterneqarnissaa pisariaqartoq Siumut isumaqarpoq.

Timersornerli aalinerinnaangilaq kisiannili aamma qarasaasiatigut unamminerit nunarsuarmi annertusigaluttuinnarput.

Siunnersuummilu matumani pingaarnerpaat ilagaat E-sportip aamma qarasarsorluni unammiaarnerit timersuutitut akuerineqarnissaat. Siumut tamanna tunngaviatigut tapersorsorpaq, tassami E-sport inuusuttunut annertoorejussuarmik soqutigineqarpoq aammalu inuiaqatigiinni ineriartorneq malillugu nutarterineq pisariaqartoq.

Siumumiit eqqaamaqaarput inersuarmi maani qinigaaffiit siuliini Atassut una qulequtaq pillugu ilungersuuteqartartoq aammalu aningaasanut inatsit aqutugalugu piumasaqartarnermigut angusaqarluartartoq.

Siumut isumaqarpoq nutarterineq matumani pineqartut tassaasut:

- Inuusuttunut peqataasinnaanermik annertusisissasoq
- Inuit assigiinngitsunik periarfissaqanngitsut ilanngunneqarsinnaalissasut
- Aammalu timersorneq nutaanik ilusilersorneqassasoq

Timikkut aalatitsineq aammalu E-sport akornanni oqimaaqatigiittoqarnissaa pingaaruteqarpoq, tassami timersorneq aamma timikkut peqqissuunermut tunngaviuvoq. Taamaattumik Siumut isumaqarpoq E-sport ineriartortinneqartariaqartoq, kisianni timikkut aalatitsineq taarserneqassangilaq.

Siumut aamma pitsaasutut isigaa immikkut kattuffinnut GIF-imut ilaasortaangitsunut tapiissuteqarsinnaaneq, soorlumi aamma assersuutigalugu Avannaata Qimussersuanut qujanaqisumik aamma aningaasaliissuteqartartugut. Tassa Inatsimmi paragraf 11 a) aqutugalugu E-sport tapiiffiqarsinnaanissaa aqutissiuunneqarsinnaangussaaq. Taamaattorli erseqqissaatigineqassaaq aningaasanik una inatsit malitseqanngimmat suli. Taamaattumik ineriartornermi aningaasat malinnaatinneqarnissaat Siumup kissaatigaa, timersuutit allat ilanngartuiffiqinnginnissaat piumasarigatsigu.



Siumumiit isumaqarpugut aningaasaliissutit atorneqartarnerat pillugu ersarissuseq aammalu nakkutilliineq pingaaruteqarluinnarpoq, ingammik ingerlatata nutaat aaqqissuussaangitsullu ilanngunneqalernerini.

Siumumiit pitsaasutut isigaarput Anti Doping Greenlandip allaffissornikkut avissaartinneqarnissaa pillugu anguniagaq, kisianni ingerlatsineq pitsaasumik aammalu akisussaaffiit ersarissumik agguataarneqarlutik ingerlanneqarnissaat pingaaruteqarpoq.

Naggasiullugu Siumumiit erseqqissaatigaarput timersorneq inuiaqatigiinni ataatsimoortitsissasoq, immikkoortitsinani. Taamaattumik pingaaruteqarpoq timersornermi ineriartortitsineq peqataatitsisoq aammalu ataatsimoorfiusoq qulakkeerneqassasoq, minnerunngitsumik timersuutit nutaat ilanngunneqarnerisigut.

Tamanna tunngavigalugu Siumut siunnersuut tapersersorpaa, aammalu mianerisassat ilanngullugit eqqummaariffiginissaat maluginiaqqullugu.

Taamatut oqaaseqarluta Siumup siunnersuut Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiititaliamut ingerlateqqinneqassasoq.

Erik Jensen. Siumut